



XUNTA DE GALICIA

CONVENIO DE COLABORACIÓN ENTRE A CONSELLERÍA DE INFRAESTRUTURAS E MOBILIDADE E ABANCA CORPORACIÓN BANCARIA, S.A. PARA A APLICACIÓN DA TARXETA DO TRANSPORTE DE GALICIA XENTE NOVA

Santiago de Compostela, 18 de decembro de 2020

REUNIDOS:

D. Ignacio Maestro Saavedra, director xeral de Mobilidade da Consellería de Infraestruturas e Mobilidade da Xunta de Galicia, en representación da devandita Consellería, actuando por delegación da conselleira de Infraestruturas e Mobilidade da Xunta de Galicia, consonte co establecido no Decreto 26/2019, do 7 de marzo, polo que se establece a estrutura orgánica da Consellería de Infraestruturas e Mobilidade, en relación coa Orde do 7 de setembro de 2017, sobre delegación de competencias no secretario xeral técnico e noutros órganos (DOG 20/09/2017).

D. Jorge Martínez Martínez, con NIF nº 36070987H, e D. José Lino Comesaña Calvo, con NIF nº 36041545Q, en nome e representación da entidade ABANCA CORPORACIÓN BANCARIA, S.A. (no sucesivo, ABANCA), en virtude do establecido nas copias das escrituras de solemnización de acordos e apoderamento, outorgadas ante os notarios Francisco Manuel Ordoñez Armán e José Piñeiro Prieto, respectivamente.

As partes recoñécense competencia no concepto no que respectivamente interveñen e con capacidade legal para formalizar o presente convenio de colaboración, e para ese efecto

EXPOÑEN:

O transporte público colectivo de persoas non só se configura como servizo público de carácter esencial para a poboación, senón que tamén contribúe á redución da contaminación e da congestión das nosas cidades e, por tanto, ao incremento da calidade de vida do conxunto da poboación.


Coa finalidade de contribuír ao impulso do sistema de transporte público colectivo, un dos eixes de actuación prioritarios é o abaratamento do custo por viaxe aos usuarios polo que, co obxectivo de fomentar a mobilidade e o uso do transporte colectivo entre a mocidade a Xunta de Galicia procedeu á implantación da tarifa Xente Nova.

Deste xeito, o 3 de agosto de 2016, a entón Consellería de Infraestruturas e Vivenda e ABANCA subscribiron un convenio de colaboración que tiña por obxecto establecer as bases de colaboración para a aplicación de bonificacións ás persoas con idades comprendidas entre os 4 anos e os 18 anos de idade, inclusive, no eido do Plan de Transporte Metropolitano de Galicia.

Con posterioridade, a Orde do 18 de decembro de 2019 pola que se regula a tarifa específica Xente Nova no transporte público interurbano da competencia da Xunta de Galicia, da Consellería de Infraestruturas e Mobilidade, publicada no DOG nº 248 do 31 de



XUNTA DE GALICIA



decembro de 2019, ampliou o ámbito de idade das persoas beneficiarias ata os 20 anos incluídos e, ademais, preveu a expansión territorial da tarifa Xente Nova mediante unha planificación programada das sucesivas ampliacións do seu ámbito territorial de aplicación ata abranguer a totalidade da Comunidade Autónoma, segundo a dispoñibilidade de sistemas de cancelación a bordo dos medios de transporte.

Consonte co indicado na citada Orde do 18 de decembro de 2019, a tarifa Xente Nova aplicouse coa súa entrada en vigor ao ámbito das denominadas áreas de transporte metropolitano de Galicia, constituídas polo conxunto de concellos situados nos contornos das cidades da Coruña, Ferrol, Lugo, Santiago de Compostela e Vigo que decidiron incorporarse ao plan de transporte metropolitano impulsado pola Xunta de Galicia.

Con posterioridade, o 13 de marzo de 2020 publicouse no Diario Oficial de Galicia a primeira expansión territorial do ámbito de aplicación da tarifa específica Xente Nova no transporte público interurbano da competencia da Xunta de Galicia pero, como consecuencia da declaración do estado de alarma para a xestión da situación de crise sanitaria ocasionada pola COVID-19 mediante o Real decreto 463/2020, do 14 de marzo, foi necesario deixar sen efecto o antedito Acordo. Coa conseguinte mellora da situación sanitaria e das medidas de desescalada e, dado que o pagamento con tarxeta constitúe un medio de prevención de transmisión do COVID-19, máis seguro que o pagamento en efectivo, o 12 de xuño de 2020 publicouse no Diario Oficial de Galicia número 114 o Acordo do 4 de xuño de 2020, da Dirección Xeral de Mobilidade, procedéndose a dar novamente efectos á expansión prevista e que tivo que ser suspendida por mor da crise sanitaria.

Deste xeito, esta ampliación do ámbito territorial desta tarifa gratuíta levou á súa aplicación non só nas Áreas de Transporte Metropolitano da Coruña, Ferrol, Lugo, Santiago de Compostela e Vigo, senón tamén á área de Pontevedra e a toda a provincia de Ourense estando prevista a súa progresiva expansión ao conxunto da Comunidade Autónoma.

Esta ampliación do ámbito de aplicación da tarifa Xente Nova anticipa a previsión por parte da Xunta de Galicia de acadar unha nova revisión do modelo de transporte metropolitano, que deberá dar lugar á creación da Área Única de Transportes de Galicia logo da implantación dos novos contratos de concesión de servizos públicos de transporte previstos no Plan de Transporte Público de Galicia.

Deste modo, o principal obxectivo que se persegue coa sinatura deste novo Convenio é manter a liña de colaboración existente entre as partes asinantes para a consolidación da expansión do ámbito de aplicación da Tarxeta Xente Nova co obxectivo final de garantir a continuidade das accións de promoción do transporte público colectivo en tanto se procede ao desenvolvemento e implantación da Área Única de Transportes de Galicia.

A Comunidade Autónoma de Galicia é competente en materia de transportes terrestres que se desenvolvan integramente dentro do seu territorio, de acordo co establecido no artigo 148.5 da Constitución Española e do artigo 27.8 do Estatuto de Autonomía de Galicia. O Decreto 26/2019, do 7 de marzo, polo que se establece a estrutura orgánica da Consellería de Infraestruturas e Mobilidade, órgano da administración autonómica ao que corresponden



XUNTA DE GALICIA

as competencias e funcións en materia de transportes, determina que a Dirección Xeral de Mobilidade terá, entre outras, as funcións relativas á implantación de plans de fomento do transporte público. O artigo 82 Catro da Lei 2/2017, do 8 de febreiro, de medidas fiscais, administrativas e de ordenación prevé a posibilidade de que poida establecerse e xestionarse no marco do sistema de transporte público bonificacións adicionais promovidas pola propia administración titular do servizo na prestación do servizo ao colectivo ao que dirixan a súa actuación.

ABANCA é unha entidade xurdida en setembro de 2011 (inicialmente co nome de NCG Banco, S.A.) como froito da segregación do negocio bancario de Novacaixagalicia, entidade que á súa vez nacera en decembro de 2010 da fusión entre Caixanova e Caixa Galicia. Deste xeito, ABANCA configúrase como a sucesora da actividade desta última, e subrógase na posición dela nas relacións xurídicas que establecece.

Trátase da única entidade bancaria que manifestou o seu interese por adaptarse ás condicións esixidas para o funcionamento da Tarxeta Xente Nova, se ben a posibilidade de participación por parte doutras entidades bancarias que o desexen segue aberta.

De conformidade co exposto, é vontade das partes relacionadas no encabezamento proceder á execución dunha serie de actuacións conxuntas que permitan o mantemento e consolidación da aplicación das bonificacións tarifarias no transporte público colectivo respecto da Xente Nova (persoas con idades comprendidas entre os 4 e os 20 anos inclusive), polo que

ACORDAN

Asinar este documento, e obrigarse reciprocamente ao seu cumprimento, de conformidade coas seguintes,

CLÁUSULAS

Primeira.- Obxecto e ámbito de aplicación

O presente acordo ten por obxecto:

- Renovar as bases de colaboración entre as partes asinantes para a aplicación de bonificacións á Xente Nova (persoas con idades comprendidas entre os 4 e os 20 anos, inclusive) consolidando a expansión do seu ámbito de aplicación ao conxunto do territorio galego.
- Adquirir 52.000 Tarxetas do Transporte de Galicia identificadas como "TMG Xente Nova".

Segunda.- Condicións relativas á adquisición das Tarxetas do Transporte de Galicia Xente Nova (TMGXN)



XUNTA DE GALICIA

1.- Respecto da compra das Tarxetas do Transporte de Galicia Xente Nova, acordase un custo unitario máximo de adquisición de 2,879 €. As ditas tarxetas serán entregadas gratuitamente as persoas usuarias coas excepcións indicadas neste convenio para os casos de renovación, substitución, perda ou análogos asumindo a Consellería de Infraestruturas e Mobilidade o seu importe íntegro.

2.- As contías asumidas pola Consellería de Infraestruturas e Mobilidade aboaranse no exercicio 2020 con cargo á aplicación orzamentaria 2020.08.02.512A.470.1, para o que ABANCA deberá certificar e xustificar contablemente a dispoñibilidade das referidas 52.000 tarxetas para a súa expedición ás persoas usuarias, así como o prezo final aboado por elas. O prezo final, co límite de 149.708,00 euros, será abonado pola Dirección Xeral de Mobilidade logo da presentación da anterior xustificación por parte de ABANCA, presentación que deberá ter entrada na Dirección Xeral de Mobilidade da Consellería de Infraestruturas e Mobilidade non máis tarde do 20/12/2020.

Terceira.- Xestión da emisión da Tarxeta do Transporte de Galicia Xente Nova (TMG Xente Nova)

a) Emisión da tarxeta

Poden ser titulares da Tarxeta do Transporte de Galicia Xente Nova as persoas con idades comprendidas entre os 4 e os 20 anos, inclusive, tendo en conta que cada persoa poderá ser titular dunha única TMG Xente Nova.

A emisión da tarxeta realizarase nas oficinas distribuidoras de TMG de ABANCA relacionadas no anexo a este Convenio, que foron acordadas entre a Consellería e ABANCA. Para organizar a xestión da TMG Xente Nova, ABANCA dispón dunha aplicación informática que facilitará ás persoas interesadas a solicitude dunha cita previa para a xestión das altas de tarxetas en calquera das oficinas expendedoras. O acceso á aplicación informática de cita previa realizarase mediante un enlace directo dende a páxina web da Xunta de Galicia na que se dea información relacionada coa TMG Xente Nova, para o que a Xunta de Galicia disporá dunha denominación desta páxina web específica de doada identificación. Para aquelas persoas usuarias que non dispoñan da aplicación informática de ABANCA estarán habilitadas as oficinas que se indican igualmente no anexo, nas que poderán obter a TMG Xente Nova de modo presencial.

ABANCA debe comprobar os datos de idade e identidade da persoa que desexe acceder á titularidade dunha TMG Xente Nova, así como que non posúe xa outra TMG Xente Nova previamente expedida. Respecto das persoas menores de idade o contrato irá asinado polo representante legal ou persoa titora.

Para poder dispoñer dunha Tarxeta Xente Nova deberá dispoñerse e presentar na oficina distribuidora o DNI, NIF, pasaporte, NIE, tarxeta de residente ou outro documento análogo da persoa titular da tarxeta que acredite a súa idade e identidade. Igualmente, cando a persoa titular da Tarxeta Xente Nova sexa menor de idade, deberá achegarse o libro de familia ou documento análogo que acredite a patria potestade ou tutela da persoa que actúe



XUNTA DE GALICIA



na súa representación, así como o DNI ou documentos análogos desta persoa representante.

ABANCA deberá dixitalizar a documentación achegada e os ficheiros deben estar dispoñibles en formato pdf ou jpg. Esta información será almacenada e custodiada por ABANCA quen deberá remitir a que lle sexa requirida pola Dirección Xeral de Mobilidade no prazo de 72 horas dende a data de petición.

ABANCA remitirá diariamente a información relativa á xestión das tarxetas (altas, baixas, substitucións) en formato alfanumérico vía Editran. Esta información será transferida á aplicación Social da Xunta de Galicia.

b) Substitución da tarxeta

As substitucións da tarxeta durante o período de garantía debidas a problemas de funcionamento que non sexan debidas a unha mala utilización ou conservación polas persoas usuarias, serán gratuítas.

As substitucións da tarxeta que non estean comprendidas na garantía terán un custo de emisión para as persoas usuarias de 2 €, importe que se deducirá da remesa de recargas inmediatamente posterior que por xestión da tarifa Xente Nova realice a Administración cando dita substitución corresponda ao stock de tarxetas identificadas no punto 1 da cláusula segunda precedente ou á adquisición efectuada con base no convenio do 3 de agosto de 2016.

c) Expiración da tarxeta

Toda vez que a persoa titular da Tarxeta Xente Nova cumpra os 21 anos de idade, perderá o dereito a beneficiarse da tarifa Xente Nova. ABANCA bloqueará a tarxeta para a admisión de calquera recarga que non sexa remitida pola Administración, sen prexuízo da posibilidade de seguir empregando a tarxeta coas tarifas ordinarias que resulten de aplicación para un pagamento con tarxeta de transporte, ata o esgotamento do saldo dispoñible. O saldo da Tarxeta Xente Nova poderá transferirse a unha tarxeta de uso xeral para o seu consumo en transporte. Esta operación só pode efectuarse respecto da mesma persoa titular e sempre que esta non reúna os requisitos para poder beneficiarse dunha Tarxeta Xente Nova. Agás en supostos excepcionais de necesidade económica valorados previamente e autorizados pola Administración, o saldo da Tarxeta Xente Nova non poderá ser recuperado en efectivo.

d) Perda ou subtracción da tarxeta

No suposto de perda ou subtracción da tarxeta perderase o saldo existente nela, e será obriga da súa persoa titular, ou da persoa que a represente, a comunicación deste feito a ABANCA. Nos casos de perda ou subtracción, ABANCA procederá á baixa da tarxeta, co que non resultará posible realizar operacións de recarga nela, logo do que poderá solicitarse



XUNTA DE GALICIA



a expedición dunha Tarxeta Xente Nova consonte co previsto para os supostos de substitución.

Non se expedirá unha nova Tarxeta Xente Nova en substitución daquelas que fosen anuladas por incumprir os deberes que corresponden ás persoas titulares e, especificamente, as que fosen anuladas pola súa utilización por persoa diferente da súa titular sen comunicación previa da súa subtracción ou perda.

Cuarta.- Tarifas aplicables na tarxeta do transporte de Galicia. Bonificacións para a Xente Nova

1.- Quincenalmente procesaranse os datos das viaxes realizadas coas tarxetas dadas de alta na aplicación social co perfil Xente Nova para calcular os datos dos importes a reintegrar que deben operar respecto de cada tarxeta. O proceso de cálculo realizarase o día 1 e o día 16 de cada mes, respecto das viaxes realizadas na primeira quincena e na segunda quincena do mes anterior, respectivamente. Os ficheiros informáticos relativos aos reintegros que procede efectuar respecto de cada TMG Xente Nova serán remitidos a ABANCA. ABANCA debe poñer a disposición dos titulares das tarxetas os importes reintegrados para a súa aceptación nos seus caixeiros por parte destes o día 5 de cada mes (respecto das viaxes realizadas na primeira quincena do mes anterior) e o día 20 de cada mes (respecto das viaxes realizadas na segunda quincena do mes anterior).

2.- As persoas usuarias dispoñen dun prazo de dous meses para aceptar o reintegro dende a data na que esta se pon á súa disposición. No caso de non aceptar a recarga dentro do devandito prazo, esta recarga caducará e perderán o dereito a percibila. As persoas titulares poden consultar o estado das súas recargas no seguinte enlace: <http://tmg.xunta.gal/consulta-tarxeta>. ABANCA remitirá á Xunta de Galicia os ficheiros relativos ás recargas caducadas, a cal minorará o crédito na parte non disposta das liquidacións quincenais inmediatas.

Quinta.- Títulos de viaxe válidos para beneficiarse da tarifa Xente Nova

Para os efectos da aplicación da tarifa Xente Nova só será válido como título da viaxe a Tarxeta do Transporte de Galicia Xente Nova (TMG Xente Nova).

A TMG Xente Nova será de uso exclusivo do seu titular, quen se responsabiliza da súa custodia e correcto uso, estando obrigado a comunicar á ABANCA a súa perda ou deterioro para proceder á súa anulación ou substitución.

Sexta.- Obrigas asumidas por ABANCA

1.- Xestionar as altas, baixas, substitucións e expiracións das TMG Xente Nova, previa verificación dos datos relativos á idade e identidade. Cada persoa beneficiaria debe dispoñer dun contrato individual de TMG Xente Nova asinado coa entidade bancaria colaboradora. No caso de menores de idade, o contrato será subscrito por algún dos proxenitores ou persoa titora.



XUNTA DE GALICIA

2.- ABANCA deberá dixitalizar a documentación achegada e os ficheiros deben estar dispoñibles en formato pdf ou jpg. Esta información será almacenada e custodiada por ABANCA quen deberá remitir a que lle sexa requirida pola Dirección Xeral de Mobilidade no prazo de 72 horas dende a data de petición

3.- ABANCA remitirá diariamente a información relativa á xestión das tarxetas (altas, baixas e substitucións) en formato alfanumérico vía Editran. Esta información será transferida á aplicación Social da Xunta de Galicia.

4.- ABANCA debe remitir a información que identifique todas a precargas da TMG Xente Nova (por nova emisión ou reintegro) que permita identificar o seu estado (pendente, caducada, cobrada).

5.- ABANCA debe poñer a disposición das persoas titulares das TMG Xente Nova os reintegros remitidos pola Administración os días 5 e 20 de cada mes natural.

Sétima.- Obrigas asumidas pola Consellería de Infraestruturas e Mobilidade (Dirección Xeral de Mobilidade).

Abonar a ABANCA os importes correspondentes as tarxetas adquiridas por esta entidade, así como ás precargas aceptadas polas persoas usuarias, logo de que xustifique a súa adquisición e a aceptación da precarga na forma prevista neste Convenio.

Tramitar os abonos dos importes correspondentes aos reintegros para materializar a tarifa aplicable ao colectivo Xente Nova e remitir os ficheiros correspondentes a ABANCA para a súa posta a disposición das persoas titulares da TMG Xente Nova.

Promover a utilización da aplicación de cita previa desenvolta por ABANCA á que se fai referencia na letra a) da cláusula terceira deste Convenio, na publicidade institucional da TMG Xente Nova. Igualmente, incluírá na páxina web da Xunta de Galicia referida a esta tarxeta a información destacada referente á indicada aplicación e un enlace directo á mesma.

Oitava.- Crédito e aplicación orzamentaria

As obrigas económicas establecidas con base neste Convenio acadan o importe de 149.708,00 € que serán financiadas con cargo á aplicación orzamentaria 08.02.512A.470.1 da Xunta de Galicia no exercicio 2020.

Novena.- Deber de confidencialidade.

9.1 Cada unha das partes comprométese a cumprir, no ámbito de execución do presente Convenio, coas obrigas e deberes que respectivamente lles correspondan, de conformidade co disposto no Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos (en diante, "RXPd"), así coma na Lei Orgánica 3/2018, do 5 de decembro, de protección de datos persoais e garantía dos



XUNTA DE GALICIA



dereitos dixitais (en diante, "LOPDXDD") e en calquera normas aplicables ou que no futuro poidan promulgarse en desenvolvemento da anterior.

9.2 Aos efectos do disposto neste Convenio en relación coa emisión e xestión da Tarxeta do Transporte de Galicia Xente Nova, ABANCA terá acceso a datos de persoas físicas de cuxo tratamento é responsable a Consellería de Infraestruturas e Mobilidade da Xunta de Galicia aos efectos establecidos na lexislación vixente. ABANCA levará a cabo o acceso aos datos persoais na súa condición de Encargada do Tratamento, segundo o establecido no artigo 28 do RXPd e con suxeición ao réxime que se establece a continuación:

- a. Tratar os datos persoais aos que teña acceso seguindo as instrucións do responsable do tratamento, inclusive respecto ás transferencias internacionais de datos a un terceiro país ou organización internacional, salvo que estea obrigada a realizalas en virtude do Dereito da Unión ou dos Estados membros. Se ABANCA considera que algunha das instrucións indicadas polo responsable do tratamento infrinxe o RXPd ou calquera outra disposición en materia de protección de datos, esta informará inmediatamente ao responsable do tratamento.
- b. Utilizar os datos persoais obxecto de tratamento, ou os que recolla para a súa inclusión, unicamente coa finalidade obxecto de este encargo. En ningún caso poderá utilizar os datos para fins propios.
- c. Garantir a formación necesaria en materia de protección de datos persoais das persoas autorizadas para tratar datos persoais.
- d. Gardar, baixo o seu control e custodia os datos persoais obxecto de tratamento e non divulgálos, transferilos ou, de calquera outra forma, comunicalos, nin sequera para a súa conservación, a outras persoas, salvo que conte coa autorización do responsable do tratamento, nos supostos legalmente admisibles.
- e. Levar, por escrito, un rexistro de todas as categorías de actividades de tratamento efectuadas por conta do responsable do tratamento, segundo o disposto no artigo 30.2 do RXPd.
- f. Dar apoio ao responsable do tratamento na realización de avaliacións de impacto relativas á protección de datos e de consultas previas á autoridade de control cando, conforme a normativa de protección de datos, resulte necesario.
- g. Designar, cando cumpra, un delegado de protección de datos e comunicar os seus datos de contacto ao responsable do tratamento. A estes efectos, faise constar que ABANCA conta cun delegado de protección de datos, formalmente designado, co que o responsable do tratamento pode poñerse en contacto a través da dirección privacidad@abanca.com.
- h. Implantar as medidas de seguridade e mecanismos establecidos no artigo 32 do RXPd.
- i. Notificar ao responsable do tratamento, sin dilación indebida e, en todo caso no prazo máximo de corenta e oito (48) horas as violacións de seguridade dos datos persoais ao seu cargo das que teña coñecemento xunto con toda a información relevante para a documentación e comunicación da incidencia. Esta notificación non será necesaria cando sea improbable que a devandita violación de seguridade constitúa un risco para os dereitos e liberdades das persoas físicas afectadas.
- j. Asistir ao responsable do tratamento na resposta ao exercicio dos dereitos dos interesados. Neste senso, ABANCA dará traslado da correspondente solicitude de forma in-



mediata ao responsable do tratamento e, en todo caso, no prazo máximo de cinco (5) días hábiles dende a súa recepción para que o responsable do tratamento resolva a solicitude.

- k. En relación co deber de información esixido polo RXP, ABANCA, no momento de recollida dos datos, debe facilitar a información relativa aos tratamentos de datos que se van a realizar. A redacción e formato en que se facilitará a información deberase consensuar co responsable do tratamento antes do inicio de recollida dos datos.
- l. Devolver ao responsable do tratamento os datos persoais unha vez finalizado o presente Convenio. Con todo, ABANCA poderá conservar os datos e a información tratada, debidamente bloqueada, no caso de que puideran derivarse responsabilidades na súa relación co responsable do tratamento. Transcorrido o prazo de prescrición das accións que motivaron a conservación dos datos, ABANCA deberá proceder a súa destrución.
- m. Non subcontratar ningunha das prestacións que formen parte do obxecto deste Convenio que comporten o tratamento de datos persoais, salvo os servizos auxiliares necesarios para o normal funcionamento dos servizos realizados por ABANCA.

Se fose necesario subcontratar algún tratamento, este feito deberase comunicar previamente e por escrito ó responsable do tratamento cunha antelación de quince (15) días, indicando os tratamentos que se pretenden subcontratar e identificando de forma clara e inequívoca á empresa subcontratista e os seus datos de contacto. A subcontratación poderase levar a cabo se o responsable do tratamento non manifesta a súa oposición no citado prazo.

O subcontratista, que tamén terá a condición de encargado do tratamento, está obrigado igualmente a cumprir coas obrigas establecidas neste documento para o encargado do tratamento e as instrucións que dite o responsable do tratamento. Corresponde ó encargado inicial regular a nova relación de xeito que o novo encargado quede suxeito ás mesmas condicións (instrucións, obrigas, medidas de seguridade, etc.) e cos mesmos requisitos formais que el, no referente ao adecuado tratamento dos datos persoais e á garantía dos dereitos das persoas afectadas. No caso de incumprimento por parte do subencargado, o encargado inicial seguirá sendo plenamente responsable ante o responsable do tratamento no referente ao cumprimento destas obrigas.

- n. Manter o deber de segredo respecto aos datos de carácter persoal ós que tivera acceso con motivo do presente encargo, incluso despois de finalizado este.

A natureza e finalidade do tratamento de datos que ABANCA realizará, así coma o tipo de datos persoais e categorías de interesados a que o devandito tratamento se refire, recóllense a continuación:



XUNTA DE GALICIA



TRATAMENTOS A REALIZAR	☐ Recollida ☐ Rexistro ☐ Estruturación ☐ Modificación ☐ Conservación ☐ Extracción ☐ Consulta ☐ Comunicación por transmisión ☐ Difusión ☐ Interconexión ☐ Cotexo ☐ Limitación ☐ Supresión ☐ Destrución ☐ Conservación ☐ Outros:
FINALIDADE DO TRATAMENTO	☒ Emisión e xestión da Tarxeta XENTE NOVA da Xunta de Galicia
TIPOLOXÍA DE DATOS	☐ Datos de carácter identificativo ☐ Características persoais ☐ Datos académicos e profesionais ☐ Circunstancias sociais ☐ Económicos, financeiros ou de seguros ☐ Categorias especiais de datos ☐ Outros:
CATEGORÍAS DE DATOS	☐ Pais ou titores ☐ Representante legal ☐ Solicitantes ☐ Outros:

9.3 Os datos persoais dos asinantes e/ou representantes que subscriben o presente Convenio en nome e representación de cada parte, serán tratados coa finalidade de xestionar e executar o presente Convenio. A base xurídica para o tratamento de tales datos atópase no interese lexítimo das Partes en garantir o correcto desenvolvemento e execución da relación contractual.

Os referidos datos persoais conservaranse durante a vixencia do Contrato e posteriormente, sempre que non se exercite o dereito de supresión, durante os prazos legais que resulten de aplicación. En concreto os datos persoais que sirvan como xustificante da relación



XUNTA DE GALICIA



contractual establecida e/ou do cumprimento de obrigas legais derivadas da mesma, serán conservados, debidamente bloqueados, durante os prazos de conservación que imponha a normativa aplicable, así como durante os prazos de prescripción das accións civís, penais, administrativas ou de calquera outro tipo que puidesen derivarse da relación contractual.

Os titulares dos datos poderán exercer os dereitos de acceso, rectificación, supresión, oposición, limitación do tratamento e portabilidade mediante petición escrita:

- Respecto de ABANCA, a través do enderezo electrónico: privacidad.proveedores@abanca.com
- Respecto da Consellería de Infraestruturas e Mobilidade da Xunta de Galicia, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>

Así mesmo, os interesados poderán dirixir as súas reclamacións derivadas do tratamento dos seus datos á Axencia Española de Protección de Datos (www.aepd.es) no caso de considerar vulnerados os seus dereitos.

Décima.- Comisión de seguimento.

Establécese unha comisión mixta de seguimento deste convenio, á que serán sometidas as cuestións que expresamente se prevén no mesmo así como aquelas outras que deriven do desenvolvemento deste acordo aínda que non estean expresamente recollidas nel, así como aquelas que impliquen desconformidade por algunha das partes asinantes.

Esta comisión está composta por:

- Pola Consellería de Infraestruturas e Mobilidade, o director xeral de Mobilidade ou a persoa en quen delegue, que a preside.
- Por ABANCA, o Director de Medios de Pago ou persoa en quen delegue.
- Actuará como secretario ou secretaria unha ou un funcionario da Dirección Xeral de Mobilidade.

Décimo primeira.- Natureza xurídica e normativa aplicable

Este convenio atópase incluído dentro dos previstos no artigo 6.2 da Lei 9/2017, de 8 de novembro de 2017, de contratos do sector público, polo que queda fóra do ámbito de aplicación desta lei. Non obstante, aplicaranse os principios desta norma para resolver as dúbidas ou lagoas que puidesen presentarse.

Este convenio rexerá polas súas cláusulas e pola Lei 40/2015, do 1 de outubro, de réxime xurídico do sector público, así como polas disposicións que en materia de convenios se recollen na Lei 1/2016, do 18 de xaneiro, de transparencia e bo goberno da Xunta de Galicia.



XUNTA DE GALICIA



Décimo segunda.- Transparencia e publicidade

Este convenio será obxecto de publicación nos termos do artigo 15 da Lei 1/2016, do 18 de xaneiro, de transparencia e bo goberno e demais normativa aplicable, e as partes manifestan o seu consentimento para que os datos persoais que consten no convenio, e mailo resto das especificacións contidas neste, poidan ser publicadas no Portal de Transparencia e Goberno Aberto.

Décimo terceira.- Entrada en vigor e vixencia

O presente convenio entrará en vigor o mesmo día da súa sinatura, e manterá a súa vixencia por un prazo de catro anos prorrogables por catro anos adicionais por acordo da comisión de seguimento establecida na estipulación décima do propio convenio.

Non obstante o anterior, a súa vixencia estará condicionada ao mantemento da tarifa Xente Nova pola Xunta de Galicia.

Sen prexuízo do anterior, á finalización do período indicado e, no seu caso, da prórroga acordada, ABANCA manterá ás obrigas de xestión da utilización da TMG Xente Nova en iguais condicións ás previstas para a TMG de uso xeral, nos termos do convenio de colaboración asinado o 10 de abril de 2008. Salvo acordo expreso da comisión de seguimento deste último convenio, o mantemento destas condicións non suporá a posibilidade de comercializar novas TMG Xente Nova emitidas previamente que as procedentes da Administración. Neste sentido, máis alá desa data, as partes asinantes manteñen as súas obrigas en relación coa tramitación de recargas derivadas da tarifa Xente Nova ás que tivesen dereito as persoas titulares da TMG Xente Nova por desprazamentos realizados durante o prazo de vixencia deste convenio.

Aos catro meses de ter expirado o prazo de vixencia do convenio, ABANCA remitirá á Dirección Xeral de Mobilidade da Consellería de Infraestruturas e Mobilidade a liquidación económica do remanente de crédito que, no seu caso, puidese existir derivado de recargas que non fosen finalmente aceptadas polas persoas titulares das tarxetas ou por calquera outro concepto, e este será ingresado na conta xeral da Xunta de Galicia.

E para que conste, e en proba de conformidade, os comparecentes asinan dixitalmente o presente convenio no lugar e data indicados no encabezamento.

Pola Consellería de Infraestruturas e
Mobilidade

Por ABANCA CORPORACIÓN BANCARIA, S.A.

Ignacio Maestro Saavedra

Jorge Martínez Martínez

José Lino Comesaña Calvo

